

ARAHAN 3/2020

DI BAWAH BAB 62A AKTA PENYAKIT BERJANGKIT PENGGAL 204

1. Menurut Perintah Akta Penyakit Berjangkit (Pindaan) 2020 yang berkuatkuasa bermula 30 Januari 2020 dan sebagaimana kenyataan media Kementerian Kesihatan yang disiarkan pada 10 Rejab 1441 bersamaan dengan 5 Mac 2020, penilaian risiko bagi negara-negara terjejas telah diteliti semula seperti berikut,

1.1. Mana-mana pelawat yang telah berada di Republik Islam Iran dan Itali dalam masa 14 hari sebelum tiba di Negara Brunei Darussalam adalah **tidak dibenarkan masuk ke negara ini termasuk bagi tujuan transit**. Larangan ini adalah sama dengan larangan yang sedia ada bagi pelawat-pelawat yang tiba dari wilayah Hubei, Jiangu dan Zhejiang di Republik Rakyat China dan adalah dikecualikan bagi rakyat dan penduduk Negara Brunei Darussalam.

2. Setakat 4 Mac 2020, semua negara-negara yang terjejas oleh wabak COVID-19 telah dibahagikan kepada empat kategori:

Kategori A - Negara-negara yang menunjukkan penularan jangkitan yang berterusan.

Termasuk: *Mainland China*, Itali, Republik Islam Iran, Republik Korea.

- Kategori B - Negara-negara yang menunjukkan penularan jangkitan yang terhad tetapi kluster bersaiz besar telah dilaporkan.
Termasuk: Perancis, German, Hong Kong SAR, Jepun, Singapura.
- Kategori C - Negara-negara yang menunjukkan penularan setempat.
Termasuk: Macau SAR, Malaysia (kecuali Sabah, Sarawak dan Labuan), Taiwan, Thailand, United Kingdom, Amerika Syarikat, Vietnam.
- Kategori D - Negara-negara yang melaporkan *isolated cases* atau kes yang diimport.
Termasuk: Negara-negara lain yang terjejas
3. Orang ramai adalah **dinasihatkan untuk mengelakkan daripada membuat perjalanan yang tidak penting (*non-essential travel*) ke negara-negara yang tersenarai di dalam Kategori A, B dan C.** Dalam pada itu, orang ramai juga **dinasihatkan untuk mengelakkan dari keluar negara pada musim cuti persekolahan** yang akan menjelang tidak lama lagi. Walau bagaimanapun, orang ramai yang melakukan perjalanan keluar negara adalah dinasihatkan untuk sentiasa mengambil langkah-langkah berjaga-jaga dan mengutamakan amalan kebersihan diri bagi menghindari sebarang risiko jangkitan. Ini adalah terutamanya bagi mereka yang berisiko tinggi seperti penghidap penyakit kronik (diabetes, penyakit kardiovaskular, penyakit buah

- pinggang, penyakit respiratori dan kanser), warga emas serta perokok.
4. Bagi rakyat dan penduduk Negara Brunei Darussalam yang pulang daripada negara-negara yang disenaraikan di dalam Kategori A adalah dikehendaki untuk menjalani pengasingan diri (*self-isolation*) selama 14 hari sebaik saja tiba di negara ini. **Pengasingan diri (*self-isolation*)** bererti mengasingkan diri dari menyertai aktiviti-aktiviti yang melibatkan orang awam dan ditegah dari keluar rumah atau menerima tetamu atau pergi ke tempat awam di sepanjang tempoh pengasingan, kecuali untuk mendapatkan rawatan perubatan. Sesiapa yang memerlukan pengesahan pengasingan diri bolehlah menghubungi Bahagian Kawalan Penyakit, Kementerian Kesihatan di talian 2380316 ataupun 2380318 pada waktu berkerja.
 5. Manakala sesiapa yang baru tiba di negara ini dari negara-negara yang tersenarai di dalam Kategori B dan Kategori C hendaklah melakukan pemantauan diri (*self-monitoring*) tanpa perlu mengasingkan diri daripada orang lain. **Pemantauan diri (*self-monitoring*)** bererti memantau kesihatan diri sendiri tanpa pengasingan diri selama 14 hari dan jika mempunyai simptom-simptom demam panas atau tanda-tanda jangkitan penafasan seperti batuk kering atau susah bernafas, perlu mendapatkan pemeriksaan kesihatan dengan segera di pusat-pusat kesihatan.

6. Kementerian Kesihatan akan sentiasa mengemaskini senarai negara-negara di dalam semua kategori mengikut situasi semasa. Maklumat terkini mengenai negara-negara di dalam setiap kategori boleh diperolehi dengan menghubungi Talian Nasihat Kesihatan (*Health Advice Line*) 2381380 dan 2381383 pada waktu berkerja atau dengan melayari laman sesawang Kementerian Kesihatan www.moh.gov.bn/SitePages/COVID-19.aspx
7. Sesiapa yang didapati melanggar atau ingkar arahan yang telah dikeluarkan ini maka ianya adalah menjadi satu kesalahan di bawah Akta Penyakit Berjangkit (Penggal 204) yang mana jika didapati bersalah boleh membawa denda sehingga \$10,000 atau penjara sehingga tempoh 6 bulan atau kedua-duanya sekali.

Tarikh: 26 Syawal 1441
18 Jun 2020